

Date – 14/05/2025
Time - 7:30 -7:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Chief Minister Pu Lalduhoma kaihhruai Council of Minister Meeting nimina thukhawm chuan sorkar in a enkawl Provincialised school a thawkte lak an nih dan zirchiangtu tur study team din ni se a ti.
2. Chief Minister Pu Lalduhoma hovin Sawhthing zai lep tih ro mek chungchang nimin khan sawiho a ni .
3. Prime Minister Narendra Modia chuan Islamabad vauin Pakistan-ah firfiakte tan zalen taka chetna tur hmun a awm tawh lo a ti.
4. Punjab-ah zu chhe in avangin mi 21 an thi a midang engemawzat damdawiinah dahluh an ni.

<><><>

CABINET MEETING

Chief Minister Pu Lalduhoma kaihhruaiin Council of Ministers Meeting nimina Cabinet Meeting room-a thukhawm chuan sorkar in a enkawl Provincialised school a thawkte lak an nih dan zirchiangtu tur study team din ni se a ti.

Mizoram School Education Department (Terms and condition of appointment of teaching & non-teaching staff of provincialized school) Rules, 2023 chu Law Department ten an zir chian hnuah India danpui kalh a ni an tih avangin a taka kalpui theih a ni ta lo tih Cabinet ah hian tarlan a ni a, a tih dan dang dap turin Council of Ministers hian a zirchiangtu tur Study Team din ni se a ti a ni.

Mizoram Education (Provisional Adhoc Grant-in-Aid) Rules, 2024 thlahdul hreta school thenkhat hlankai hleihtheihloh te Provisional Adhoc Grant-in-Aid School a hlankai remtih a ni a, Mizoram Education (Lumpsum Grant-in-Aid for General Maintenance of Private Schools) Rules, 2024 pawh thlahdul hreta Lumpsum Grant-in-Aid a school hrang hrang hlankai dan dap a remti a ni.

Council Of Minister thukhawm chuan, Lunglei Pukpui a Mizoram Engineering College ah hnathawktu 63 lakna tur rawtna a pawm bawk a, Sawrkar chuan a panna kawng leh tui connection pawimawhte tih nan cheng vbc 4 leh nuai 90 a sanction tawh a ni.

Hei bakah hian, Civil Services (Combined Competitive) Examination ah optional paper awm tawh lo turin thutlukna a siam bawk.

Provisional Employees Association hrang hrang te duh danin "The Mizoram Provisional Employee Saving Scheme, 2024 pass a ni a, Tunlai mil tura tha zawk leh changtlung zawkin, investor te hip leh zual thei turin Industrial Policy 2025 siamthatna pass a ni bawk.

Aizawl Smart City Limited hi kum khat dang la kalpui leh ni se, a tul anga ennawn zel ni se tih Cebinet chuan a rel bawk a ni.

<><><>

RD MOU

Rural Development & Administration Department chuan Mizoram thingtlang khua a chhungkaw harsa zawk te chhawmdawlna kawng-a chak zawka hmalak a nih theih nan, Bharat Rural Livelihood Foundation (BRLF) chu kum 3 chhung atan thawhhona thuthlung “Memorandum of Understanding (MoU)” a ziah pui.

Bharat Rural Livelihood Foundation (BRLF) hian Mizoram chhung-a rural development kaihnawih, Sawrkar scheme leh programme hrang hrangte awmze nei zawk leh hlawk zawka kalpui a nih theih nan State Sawrkar a thawhpui ang a. Natural resource management hnuaia thil chi hrang hrang, tuihna humhalh, ramngaw leh nungcha humhalh bakah, tharchhuah ta, lam-a thingtlang miten hmasawna an neih theihna tur kawngah Department hrang hrangte leh an scheme neih hrang hrangte hmanga thawhho dan tur ruangam a siam ang. Central Schemes hrang hrangte awmze nei zawka kalpui a nih theihnan Rural Development & Administration Department nen an thawk dun dawn a ni.

He thawhhona hnuaiah hian thingtlang loneitute tan tui luang ral tur humhalhte, hlawk zawk a lei hnua tui sawngbawl theihna tur leh hlotur hmang loa hmalak tur a ni ang a. Loneitute thar chhuahte hlawk zawka kalpui tum a ni bawk. BRLF te hian a tul angin loneitute hnenah training an pe thin bawk ang.

Memorandum of Understanding (MoU) hi Rural Development & Administration Department Minister Prof Lalnilawma hova ziah a ni a, Rural Development & Administration Department aiawhin Pu V. Lalengmawia Additional Secretary leh Bharat Rural Livelihood Foundation (BRLF) aiawhin Pu Kuldeep Singh, CEO ten an hming an ziaak a ni.

<><><>

CM

Chief Minister Pu Lalduhoma hovin Sawhthing zai lep tih ro mek chungchang nimin khan sawiho a ni a,

Tunah hian MAMB chuan Local entrepreneur 13 te chu Sawhthing Slice Dry kalpui turin a thawhpui a. Anni nena chak zawka kal dan tur leh an inbunna tur zar pharh dan te an sawi.

Mizorama processing unit rawn din duh, India ram chhung leh ram pawn firm paruk te chungchang an sawi bawk a, heng firm te mamawh hi hriatsak a, an inbun

duhna hmun te hriata, a tul anga chak taka hmalak an rel a. A umzuitu tur bik committee an siam nghal.

Tun hnaia Bangladesh-a sawhthing market chungchang ngaihvena kal, Society pakhat report pawh meeting-ah hian an thlirho a ni.

Sawhthing lei tawh chin report ngaihthlak a ni bawk a. Notified crops palite lei nan sawrkarin MAMB ah cheng vbc 62 leh nuai 59 dah tawh a. MAMB hian sawrkarah cheng vbc 20 an dil belh leh mek. DAMC lama third release thlenga pawisa pek tawh chu Rs. 58,08,00,100 a ni. Sawhthing lei tawh zat hi 1,13,627 quintals a ni a, a then hi direct purchase, a then support price hmanga lei an ni. An hralh lehna atangin MAMB hian cheng vbc 6 chuang a hmu let ve tawh thung.

Meetingah hian Pu PC Vanlalruata, Agriculture Minister, Pu F. Rodinglana, Industry Minister, Dr. KC Lalmalsawmzauva, Adviser to CM leh official pawimawh te an tel.



OPERATION SINDOOR SOLIDARITY MARCH

BJP Mizoram chuan "OPERATION SINDOOR" ral hmatawnga awm India Sipai, Mizo tlangval huaisen te zahna leh an thlawpna lantir nan vawiin chhun dar 12 hian Aizawlah kawngzawh huaihawt an tum a,

Pahalgam, Jammu & Kashmir a Pakistan thlawp Firfiak ten pawisawi lo te pawng kahin Nunna hlu tak an chan kha pawl an ti a, Terrorist te support-tu Pakistan chuan an pawikhawih nasa tak avang inan tuar ngei tur a ni tih an dinna a ni tih sawiin BJP Mizoram chuan he indonaah hian Mizo tlangval huaisen engemaw zah ral hmatawngah an awm a, an ram tan zan mu lo leh thih huamin ral an do a, hetihlai hian an thlawpna leh zahna lantir an tum tih an sawo ni.

Aizawl Tresury Square-a War Memorial atanga Vanapa Hall kawt thleng kawng zawh tur a ni a, Ral hmatawnga awm Mizo tlangval Sipai huaisen chhungte, Ex-Service leh NGO te, Party hrang hrangte leh Mizo mipuite, Party bil awm lova tel turin an sawm tih BJP Mizoram State President Pu Vanlalhmuaka chuan a sawi a ni.



ART EXHIBITION

Information & Public Relation Department leh Mizoram Art Development Society, MADS-in an sponsor painting exhibition ni 5 chhung awh tur chu Aizawl Vanapa Hall-ah neih mek a ni a,

Lemziak chi hrang hrang 40 chu lei theiha pho chhuah a ni a, lemziak te hi thupui chi 3—ah then niin, Bible lam hawi- Biblical, Mizo zia rang lang thei Scenery leh thil dang ten a then hrang a ni. Vawiina lemziak phochhuah tam zawk hi acrylic on canvas deuh vek a ni a, lemziaktu Vanlalzarzova chuan Mizo mipuite chuan lemziak an ngaihlu thiam tawh hle a a hriat thu a sawi a, ngaihndan leh thlir dan dang hmanga thlir thiam te pawh an tam tawh hle a ti a, tun dinhmuna Mizoram sorkarin

lemziaktute chawisan na’na hma a lak dan chu lungawithlak a tih thu a sawi baw k a ni.

Lemziaktu Vanlalzarzova hian kum 2021 khan Ministry of Tribal Affairs , I&PR leh MADS tangkawp ina buatsaih Promising Artist Award 2021 a lo dawng tawh a ni.

Byte: Lemziaktu Vanlalzarzova

Nimina Exhibition hawngtu, I&PR Secretary Pi Betsy Zothanpari Sailo chuan artist thiam tak tak Mizoramin a neihte theih ang anga chawikan chu an ngaih pawimawh thu sawiin, an kutchhuak mawi tak takte phochhuahna hun buatsaih a ni thei chu lawmawm a ti a; mipuiin an hlut sak ngei a beisei thu a sawi a. Tunlai technology khawvel hmasawn zelin a hrinchhuah Artificial Intelligence hmanga lemziak hrang hrang awlsam taka siamchhuah a nih tak chungchangah I&PR Secretary chuan heng AI hmanga siam tam tak karah hian mi zawng zawngin an siamchhuah ve theih loh mihring kutchhuak nge nge chu a hlut zawk thu a sawi. Exhibition hawnna pual inkhawm hi MADS Vice President Pu Laltanpuia chuan a kaihuai a. I&PR Department officer ten an telpui baw k a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MIZORAM BLIND SOCIETY

Mizoram Blind Society-in an member mitdel thenkhat eizawna mumal nei h loh vanga khawlaia rimawi hmanga zai thinte chu khap lova, hrethiam turin sawrkar leh mipuite an ngen.

Mizoram Blind Society chuan tun hnaia an member, mitdel thenkhat, rimawi nena Aizawl New Market, Dawrpui leh hmun danga zai thinte chungchang social media lama post siam chungchangah thuchhuah an siam a, an member 6- Elvin Zothantluanga (Ainawn Veng), Lalchhandami Renthlei (Zemabawk North), Zodinpuui (Zemabawk Galili Veng), Vanlalfela (Ainawn Veng), Ramthachunga (Ainawn Veng) leh Lalrinchhana (Luangmual West Geology and Mining Complex) te dinhmun chu chiang taka an hriatpui thu sawiin; chhungkuaa eizawna mumal nei lo leh baihvai ve tak tak an ni a, mit var pangngai te anga hna remchang apiang thawk thei an nih ve loh avangin hetiang bazar leh hmun remchanga rimawi hmanga an zainaa mipuite khawngaihna tling khawm hman hian anmahni leh an chhungkua chawmin harsa takin an khawsa ve taw taw a, eizawna ngialngnet leh rinchan tlak sawrkarin a pek theih hma chuan an eizawna hmuh theih ve chhun- ni tina mipuite khawngaihna dila an zai thin chu khap lova, hrethiam hram turin Mizoram sawrkar, tualchung thuneitute leh Zoram mipuite an ngen a ni.

M.B.S. chuan nikum khan bazarpui leh khawlai hmun danga an member puiten zaina kawnga harsatna an tawh chungchangah, Dawrpui Local Council Chairman te, Persons With Disabilities (PwD) Commissioner leh Aizawl DC-ah te pawh lehkhah an lo theh luhsak tawh tih an sawi bawh a ni.

<><><>

PM VISIT AIRBASE

Prime Minister Narendra Modia chuan Islamabad vauin Pakistan-ah firfiakte tan zalen taka chetna tur hmun a awm tawh lo a ti. Nimina Punjab-a Adampur Air Force Station-ah he thu hi sawiin Pu Modia chuan firfiakte chu anmahni tualzawlah ngei nuai chimit vek turin India chuan theihna a nei tawh tih a sawi.

Operation Sindoor fakin Prime Minister Modia chuan firfiakte inkulhna hmun pakua kahchhiat niin Pakistana awm firfiak 100 chuang an thi a ti a. Firfiakten rinchhana an neih Pakistan sipaite chu India sipaiten an tukdawl tih a sawi a. Mi pawisawi lo thisen chhuah chuan sawhkhawh na tak leh nghawng rapthlak tak a nei tih an hre tawh ang a ti bawh.

Operation Sindoor beihpui thlak anih hnuah Prime Minister Narendra Modia hian nimin khan Punjab-a Adampur Air base a tlawh a. Sipai te nen inkawmhona hun tha tak an hman.. Social Media-ah an inkawmna chungchang sawiin Pu Modia chuan huaisenna ataka lantirtu, mi tumruh leh hlauhna a ngam loh sipaite nen hun an hman chu ropui atih thu a sawi a ni.
Kan corr report ngaithla ang.

<><><>

PUNJAB HOOCH

Punjab-ah zu chhe in avangin mi 21 an thi a midang engemawzat damdawiinah dahluh an ni. Vanduaina thlenna hmun hi Amitsar bial chhung Majitha hmunah niin thingtlang khaw paliah ethanol hmanga siam zu chhe in avang hian harsatna a thlang a. Chief Minister Bhagwant Mann chuan vanduaina tawh chhungkuate tlawhin he vanduainaa mawhphurtute chu hrem ngei an nih tur thu a sawi a ni.

Hetihlai hian Excise officer pahni, Deputy Superintendent of Police (DSP) pakhat leh Station House Officer pakhat chu an hna atanga suspend an ni a. Mi 10 man an ni tawh bawh a ni.
Chief Minister chuan mitthi chhungte hnenah cheng nuai 10 theuh pek a nih tur thu a puang bawh a ni.

<><><>